

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona, na 128. sjednici, održanoj 08.05.2026. godine, d o n o s i

ZAKLJUČAK

I.

Utvrđuje se Prijedlog Zakona o izmjenama i dopuni Zakona o Javnoj ustanovi Univerzitet u Zenici.

II.

Zaključak sa Prijedlogom Zakona iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

PREMIJER

Nezir Pivić

Broj: 02-_____/26
Datum, 08.05.2026. godine
Zenica

DOSTAVLJENO:

1x Ministarstvo za obrazovanje, nauku, kulturu i sport,
1x Stručna služba Skupštine,
1x a/a.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na _____sjednici, održanoj dana _____ 2026. godine, donosi

ZAKON
O IZMJENAMA I DOPUNI ZAKONA O JAVNOJ USTANOVI UNIVERZITET U ZENICI

Član 1.
(Izmjena člana 6.)

U Zakonu o Javnoj ustanovi Univerzitet u Zenici („Službene novine Zeničko-dobojskog kantona“, broj: 1/18-prečišćeni tekst, 10/18 i 13/21) u članu 6. alineja 1 mijenja se i glasi:

- „Fakultet inženjerstva i prirodnih nauka Univerziteta u Zenici, “

Član 2.
(Dopuna člana 17.)

U članu 17. iza stava 4 dodaje se novi stav 5 koji glasi:

„Organi Univerziteta svoj rad i odlučivanje uređuju poslovníkom o radu organa.“

Član 3.
(Izmjena člana 17.a)

Član 17.a mijenja se i glasi:

„Član 17.a

Organ upravljanja Univerziteta je Upravni odbor koji ima sedam članova i čine ga četiri predstavnika iz reda osnivača koje imenuje Vlada Kantona u skladu sa odredbama Zakona o ministarskim, vladinim i drugim imenovanjima („Službene novine Federacije BiH“, broj: 12/03, 34/03 i 65/13), a dva predstavnika iz reda stalno uposlenih i jednog predstavnika iz reda studenata imenuje Senat Univerziteta u javnoj i transparentnoj proceduri javnog konkursa u skladu sa Statutom.

Predsjednik Upravnog odbora imenuje se iz reda osnivača.

Senat Univerziteta je obavezan u roku od 15 dana od dana imenovanja članova Upravnog iz stava 1 ovog člana dostaviti resornom Ministarstvu akt o imenovanju članova Upravnog odbora.

Mandat članova Upravnog odbora koje imenuje Vlada Kantona je četiri godine, a mandat članova Upravnog odbora koje imenuje senat je vezan za mandat članova Upravnog odbora koje imenuje Vlada Kantona.

Postupak izbora novih članova Upravnog odbora pokreće se tri mjeseca prije isteka mandata imenovanim članovima Upravnog odbora.

Članovima Upravnog odbora pripada naknada za rad u Upravnom odboru u visini koju utvrdi Vlada Kantona.

Rektor, prorektori, rukovodioci organizacionih jedinica Univerziteta i članovi Senata ne mogu biti članovi Upravnog odbora.“

Član 4.
(Brisanje člana 18.)

Član 18. se briše.

Član 5.
(Izmjena člana 19.)

U članu 19. stav 2 mijenja se i glasi:

„Upravni odbor obavlja poslove utvrđene zakonom i Statutom, a naročito:

- na prijedlog Senata daje prethodno mišljenje na Statut;
- na prijedlog Rektora donosi akt kojim se utvrđuje način obračuna plaća i drugih primanja na Univerzitetu uz prethodnu saglasnost Vlade Kantona, te donosi opći akt o unutrašnjoj organizaciji i sistematizaciji radnih mjesta, pravilnik o radu, kao i druge opće akte iz domena finansijskog poslovanja u skladu sa zakonom i Statutom;
- donosi odluku o osnivanju drugih pravnih lica, u skladu sa zakonom i Statutom;
- utvrđuje planove finansiranja i razvoja, uključujući i organizovanje novih organizacionih jedinica i studijskih programa;
- donosi godišnji program rada Univerziteta na prijedlog Senata;
- na prijedlog Rektora donosi finansijski plan, usvaja godišnji obračun i usvaja izvještaj o izvršenju finansijskog plana iz člana 21. stav 2 alineja 11 ovog zakona;
- usmjerava, kontrolira i ocjenjuje rad Rektora odnosno direktora u domenu finansijskog poslovanja;
- rješava pitanja odnosa sa osnivačem;
- odlučuje o korištenju sredstava za rad preko iznosa utvrđenog Statutom;
- odlučuje o prigovoru zaposlenika na odluke organa Univerziteta koji su u prvom stepenu odlučivali o pravima, obavezama i odgovornostima zaposlenika iz radnog odnosa;
- najmanje jedanput godišnje podnosi osnivaču izvještaj o poslovanju i rezultatima rada Univerziteta;
- donosi konačnu odluku o izboru i razrješenju direktora Studentskog centra;
- obavlja i druge poslove u skladu sa zakonom i Statutom.“

Član 6.
(Izmjena člana 19.a)

Član 19.a mijenja se i glasi:

„Senat je najviše akademsko tijelo koje čine predstavnici akademskog osoblja na Univerzitetu, kao i predstavnici studenata.

Broj članova, sastav i način rada senata utvrđuje se Statutom.

Najmanje 15% članova Senata su studenti, predstavnici sva tri studijska ciklusa, koje bira studentski predstavnički organ.“

Član 7. (Izmjena člana 19.b)

Član 19.b mijenja se i glasi:

„Senat Univerziteta odlučuje o svim akademskim pitanjima, a posebno o pitanjima nastavne, naučne, umjetničke i stručne djelatnosti Univerziteta.

Senat Univerziteta:

- donosi Statut uz prethodno pribavljeno mišljenje Upravnog odbora;
- donosi Etički kodeks, kojim se utvrđuju etička načela u visokom obrazovanju, objavljivanju naučnih rezultata, odnosu prema intelektualnoj svojini, odnosima između nastavnika i saradnika, drugih zaposlenih i studenata, odnosu prema javnosti i sredstvima javnog informiranja i uopće o nastupanju Univerziteta, nastavnika, saradnika i studenata u pravnom prometu;
- predlaže Upravnom odboru godišnji program rada Univerziteta;
- donosi opće akte u skladu sa ovim zakonom i Statutom iz domena akademskih pitanja;
- donosi nastavne planove i nastavne programe dodiplomskog, postdiplomskog i doktorskog studija;
- bira i razrješava Rektora, a prorektore na obrazloženi prijedlog Rektora;
- donosi konačne odluke po prigovoru kandidata za izbor i razrješenje dekana i prodekana, kao i direktora instituta;
- bira akademsko osoblje na prijedlog naučno-nastavnog vijeća, odnosno vijeća organizacione jedinice;
- donosi konačne odluke po prigovoru kandidata za izbor u akademska zvanja;
- imenuje komisije u postupku stjecanja doktorata nauka;
- dodjeljuje počasno zvanje „profesor emeritus“, te „počasni doktor nauka“;
- daje inicijativu Upravnom odboru za organiziranje i ukidanje fakulteta i drugih organizacionih jedinica Univerziteta, kao i studijskih programa;
- predlaže razvojne i organizacione planove;
- imenuje stalna ili privremena tijela, radne grupe, komitete, grupe za praćenje kvaliteta rada i slično;
- propisuje odredbe kojima se regulira rad organa koje imenuje Senat;
- predlaže upisnu politiku;
- obavlja druge poslove u skladu sa zakonom i Statutom.“

Član 8.
(Izmjena člana 20.)

Član 20. mijenja se i glasi:

„Rektora Univerziteta bira i konačno imenuje Senat na osnovu javnog konkursa na mandat od četiri godine, i može biti ponovo izabran.

Ista osoba se može imenovati na dva uzastopna mandata.

Postupak izbora Rektora mora osigurati poštovanje principa zakonitosti, kvaliteta i tajnosti.

Postupak izbora, uslovi i kriteriji za izbor Rektora Univerziteta utvrđuju se Statutom.“

Član 9.
(Izmjena člana 24.)

Član 24. mijenja se i glasi:

„Statut donosi Senat Univerziteta uz prethodno pribavljeno mišljenje Upravnog odbora.

Izmjene i dopune Statuta vrše se odlukom, na način i u postupku predviđenom za njegovo donošenje.“

Član 10.
(Usklađivanje općih akata)

Univerzitet u Zenici je obavezan uskladiti Statut i druge opće akte sa ovim zakonom, najkasnije u roku od tri mjeseca od dana stupanja na snagu ovog zakona.

Član 11.
(Prečišćeni tekst)

Ovlašćuje se Zakonodavno-pravna komisija Skupštine Zeničko-dobojskog kantona da utvrdi novi prečišćeni tekst Zakona o Javnoj ustanovi Univerzitet u Zenici.

Član 12.
(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: _____/26.

PREDSJEDAVAJUĆI

Datum, _____2026. godine
Zenica

Ćazim Huskić

Obrazloženje

Pravni osnov:

Pravni osnov za donošenje ovog zakona sadržan je u članu 37. stav 1. tačka f) Ustava Zeničko-dobojskog kantona.

Razlozi za donošenje:

Na osnovu člana 18. stav (1) Zakona o kantonalnim ministarstvima i drugim tijelima kantonalne uprave („Službene novine Zeničko-dobojskog kantona”, broj: 10/15 i 8/22), postupajući po Zaključku Skupštine Zeničko-dobojskog kantona, broj: 01-30-11437-2/23 od 17.07.2023. godine, ministar Ministarstva za obrazovanje, nauku, kulturu i sport Zeničko-dobojskog kantona donio je Rješenje o imenovanju Radne grupe za usklađivanje Zakona o visokom obrazovanju i Zakona o Javnoj ustanovi Univerzitet u Zenici sa Okvirnim zakonom o visokom obrazovanju u Bosni i Hercegovini, broj: 10-02-9191-5/24 od 18.04.2025. godine, sa ciljem usklađivanja navedenih zakona sa Okvirnim zakonom o visokom obrazovanju u Bosni i Hercegovini („Službeni glasnik BiH“, broj: 59/07 i 59/09).

Predložene izmjene i dopuna Zakona o Javnoj ustanovi Univerzitet u Zenici predložene su u cilju usklađivanja sa Zakonom o visokom obrazovanju („Službene novine Zeničko-dobojskog kantona“, broj: 12/22, 15/24 - Autentično tumačenje i 5/25). Naime, Zakon o Javnoj ustanovi Univerzitet u Zenici je osnivački akt Univerziteta u Zenici, što proizlazi iz člana 1. predmetnog zakona.

Usklađivanje je izvršeno u cilju da se sa Zakonom o visokom obrazovanju i Okvirnim zakonom o visokom obrazovanju u Bosni i Hercegovini prije svega usaglase odredbe koje se odnose na način izbora članova Upravnog odbora, način donošenja Statuta Univerziteta i izbor Rektora Univerziteta u Zenici.

U prilogu također dostavljamo Mišljenje Sekretarijata za zakonodavstvo, broj: 03-02-18566-4/25 od 05.05.2026. godine, Mišljenje Ministarstva za pravosuđe i upravu, broj: 06/02-02-18566-3/25 od 06.05.2026. godine i Mišljenje Ministarstva finansija, broj: 07-02-18566-3/25 od 05.05.2026. godine.

Obrazloženje pojedinih pravnih rješenja:

Predložene izmjene i dopuna o Zakona o Javnoj ustanovi Univerzitet u Zenici („Službene novine Zeničko-dobojskog kantona“, broj: 1/18-prečišćeni tekst, 10/18 i 13/21) (u daljem tekstu: Zakon) odnose se na sljedeće članove:

- član 1., koji se odnosi na izmjenu člana 6. Zakona, imajući u vidu Odluku o promjeni naziva Metalurško-tehnološki fakultet Univerziteta u Zenici u Fakultet inženjerstva i prirodnih nauka Univerziteta u Zenici („Službene novine Zeničko-dobojskog kantona”, broj: 11/23).
- član 2. koji se odnosi na dopunu člana 17. u smislu da organi Univerziteta svoj rad i odlučivanje uređuju poslovnikom o radu organa.
- član 3., koji se odnosi na izmjenu člana 17.a Zakona odnosi se na Upravni odbor obzirom da isti nije usklađen sa Zakonom o visokom obrazovanju u pogledu načina izbora i imenovanja

Upravnog odbora, predmetne odredbe su stoga prenesene iz Zakona o visokom obrazovanju. To se prije svega odnosi da u skladu sa Zakonom o visokom obrazovanju Upravni odbor čine četiri predstavnika iz reda osnivača koje imenuje Vlada Kantona u skladu sa odredbama Zakona o ministarskim, vladinim i drugim imenovanjima („Službene novine Federacije BiH“, broj: 12/03, 34/03 i 65/13), a dva predstavnika iz reda stalno uposlenih i jednog predstavnika iz reda studenata imenuje Senat Univerziteta u javnoj i transparentnoj proceduri javnog konkursa u skladu sa Statutom, a što također predstavlja usklađivanje sa Okvirnim zakonom o visokom obrazovanju u Bosni i Hercegovini.

- članom 4. predlaže se brisanje člana 18. Zakona imajući vidu da su u skladu sa predloženom izmjenom člana 17.a Zakona te odredbe postale suvišne.
- članom 5. izvršena je izmjena stava 2. člana 19. Zakona (koji se odnosi na nadležnosti Upravnog odbora) u svrhu usklađivanja sa Zakonom o visokom obrazovanju,
- članom 6. izvršena je izmjena člana 19.a Zakona, koja se odnosi na Senat u svrhu usklađivanja sa Zakonom o visokom obrazovanju, te da se po redoslijedu u Zakonu prvo reguliše sastav odnosno rad Senata, pa tek u narednom članu nadležnosti Senata.
- članom 7. izvršena je izmjena člana 19.b Zakona u kojem su sada predviđene nadležnosti Senata, koje su istovremeno usklađene sa članom 56. Zakona o visokom obrazovanju.
- članom 8. izvršena je izmjena člana 20. u svrhu usklađivanja sa Zakonom o visokom obrazovanju, a odnosi se na izbor Rektora, a kako bi se ista odredba uskladila sa članom 58. Zakona o visokom obrazovanju, koja predviđa da rektora bira Senat na osnovu javnog konkursa, a što također predstavlja usklađivanje sa Okvirnim zakonom o visokom obrazovanju u Bosni i Hercegovini.
- članom 9. izmijenjen je člana 24., a odnosi se na donošenje Statuta koji prema Zakonu o visokom obrazovanju donosi senat visokoškolske ustanove uz prethodno pribavljeno mišljenje Upravnog odbora, a da se izmjene i dopune vrše odlukom, u postupku predviđenom za njegovo donošenje, a što također predstavlja usklađivanje sa Okvirnim zakonom o visokom obrazovanju u Bosni i Hercegovini.
- član 10. Zakona odnosi se na usklađivanje Statuta i općih akata.
- član 11. Zakona predviđa se utvrdi novi prečišćeni tekst Zakona o Javnoj ustanovi Univerzitet u Zenici.
- član 12. odnosi se na stupanje na snagu zakona.

Finansijski pokazatelji:

U Obrascu izjava o fiskalnoj procjeni je navedeno da implementacija Zakona o izmjenama i dopuni Zakona o Javnoj ustanovi Univerzitet u Zenici neće zahtijevati dodatna sredstva u Budžetu Kantona za 2026. godinu.

Imajući u vidu da se radi o izmjenama i dopuni postojećeg zakona, odnosno da nije u pitanju složen i obiman zakon, predlažemo usvajanje Prijedloga Zakona o izmjenama Zakona o Javnoj ustanovi Univerzitet u Zenici po skraćenom postupku.